

浙江文叢

國權

〔第二十冊〕

浙江出版聯合集團
浙江古籍出版社

浙江文叢

國權

〔第二十冊〕

卷六十至卷六十二

〔明〕談遷 著

浙江出版聯合集團
浙江古籍出版社

國權

起萬曆二十六年

盡萬曆二十九年

戊戌萬曆二十六年

正月丁亥朔上不朝

寧夏地震

戊子福建長樂縣河南澳地陷五丈深五尺

己丑楊鎬棄師初經畧邢玠遣李右諫通倭將行長
約弗援清正麻貴遣黃應暘賄清正議款遽引兵進

攻山砦陳寅賈勇先登垂拔鎬密令割級茅國器以
李如梅兵未至下便首功遂鳴金收兵詰朝如梅至
攻之下拔朝鮮臣李德馨訛報江上倭大至鎬倉皇
夜遁諸軍遂潰倭襲南原棄輜重亡算行長縱兵逐
北官軍失亡萬計鎬貴走星州撤兵還王京會邢玠
奏蔚山之捷

甲午禮部請皇長子冠婚閣臣及禮科給事中項應
祥等皆言之不報是後廷臣交請皆下報

乙未巡按湖廣御史趙文炳吏科給事中劉為楫各
劾兵部主事馮上知典試湖廣枉道麻城受知縣游

朋孚之賄又黃州知府瞿汝稷以同鄉曲庇朋孚上知奏辨科道交劾命免上知朋孚官聽勘調汝稷仍申飭被論官不許歸辨

經畧禦倭兵部尚書邢玠上言倭據朝鮮之南海東西亘入九百里臣等進勦力不能支必舟師入內地吾所必達必拔則防不可不慎今總兵周于德統水師如倭內入則剿使仍據朝鮮聽臣調用為夾攻之舉山東總兵李成勳宜率舟師汎長山島以守登萊之門戶備旅順之應援保定總兵暫移住天津以固內地下兵部議之

李如松為征虜前將軍總兵官鎮守遼東兼僻倭總
兵官言官交論不報

巡按江西御史葉永盛請補故吏部左侍郎張元禎
國子祭酒胡儼大學士解縉謚

丙申追封唐王長子宙枝承休王謚恭惠

戊戌廣西總兵官童元鎮浙江總兵官李應詔各易
鎮

朝鮮閑山失利亟需舟師閣議募閩海南船資防勦
從之

己亥發太僕寺金五萬犒東軍

庚子廷臣請墾田山東以巡撫奮勅原有營田事今特責成令巡撫委廉能官招流人報名墾荒辨其衍沃原隰之宜以生五穀六畜之利不數年可稱天府從之

壬寅漳州府火藥局灾傷人畜無數

癸卯刑部右侍郎朱鴻謨卒字文甫益都人隆慶辛未進士授吉安推官擢南京御史劾張居正奪情除名後復官曆今職性伉潔其守卓然歿之日藉贖金以殮贈尚書予祭葬

鄒元標曰世知公者以留臺一疏及公所至節惠

凜、然不知此公緒餘耳予故略而不論公博厚
如淵屹立如山摧之下來麾之不去所稱社稷臣
醇儒公無媿矣使公得永年光日月而扶名教可
勝道哉

甲辰趙志臯請添設兵部侍郎二三員儻督撫之選
命嚴衛嚴緝妖教

庚戌賜邢玠尚方劔

辛亥左春坊左諭德兼翰林院侍講葉向高編脩董
其昌馮有經檢討林允俞撰誥勅編修韓爌檢討朱
國禎沈淮教內書堂

甲寅安南蠻復侵欽州百戶孔榕占之

乙卯濟寧州設隣倭游擊

前吏部尚書陳有年卒年字登之餘姚人嘉靖壬戌
進士授吏部主事進員外郎歷稽勲驗封郎中在驗
封執爭朱希忠贈王事引疾去里居十年起考功郎
中時張居正敗推轂衆正進太常寺少卿擢右僉都
御史巡撫江西再諫燒造得減十之三被劾去起南
京操江進兵部侍郎歷冢宰執法澄銓忤時相去贈
太子太保謚恭介

二月丙辰朔丁巳令天津巡撫移萊州山東巡撫移濱

州順天巡撫移山海保定巡撫移天津

戊午左僉都御史郭惟賢上泰交三事補闕官定行
取錄逐臣不報

庚申大學士沈一貫侍讀學士曾朝節主禮闈

辛酉文選郎中白所知削籍以吏科給事中戴士衡
論其大選未竣匿喪營陞也尚書蔡國珍代辨且求
去上斥所知畱國珍

壬戌廣東冒籍貢士許鳴轂柯雨江除名

甲子趙志臯請欽定行取官不報

順天府丞支可大為右僉都御史巡撫湖廣浙江布

政使左布政魯如春為右副都御史巡撫河南

乙丑兵部右侍郎余立為左侍郎協理京營戎政

南京工部右侍郎董裕改刑部右侍郎

總理河道工部尚書楊一魁兼總理漕運御史馬從聘言河漕一柄兩操予盾易生故合之

丁卯南京戶部右侍郎兼右僉都御史余懋學卒學

字 婺源人隆慶戊辰進士授撫州推官進南京

戶科給事中忤張舉正除名尋復秩歷尚寶太僕光祿卿通政使至今官予祭塋贈南京工部尚書廕監

天啓初謚恭穆

焦竑曰當江陵盛時人莫能指議而公首白發之
故望余公甚迨夫柄地易黨論伸而險詖者亦往
往借以牟利卒至群言淆亂國是幾搖識者心非
之而不能絕曰吾黨也本之擊奸而竟以自固初
心之謂何余公十蠹之疏侃然顯斥之無貸豈
不為尤難哉而顧以此不容語云不容何病不容
然後見君子信矣

庚午山東按察使李誌為右僉都御史巡撫鳳陽總
督宣大兵部右侍郎王世揚回部南京太常寺卿楊
時喬為南京通政使

時錦州塞外降胡哈刺具散哈什所部來降者六百餘人云土蠻部落譯之又朵顏也撫臣議不便受科臣云無可疑

癸酉設薊鎮東南濱海副總兵一游擊二募三千三百餘人

乙亥止徵湖廣永順土兵初土司彭元錦自請率萬人東征已撫檄下相符也

戊寅以陳璘為禦倭總兵

三月丙戌朔戊子寧夏城東天鼓鳴聲如雷

御史黃紀賢言年來吏部避嫌立摯籤法凡選除升

降不問人地宜否惟籤是憑如德清知縣 繼芳以
吏科都給事中劉為揖糾降而抽籤得判霸州夫霸
州為揖里也俱未便乞另調繼芳改籤法上命繼芳
別用

己丑荆王常浩薨謚王

庚寅謚故總督兩廣戶部右侍郎蕭彥 予故太子

太保戶部尚書高燿祭塋

壬辰南京禮部右侍郎陸可教卒教字 蘭谿人

萬曆五年進士選庶吉士授編脩

予祭

丙申兵部署印左侍郎李楨言先貴竹司改新貴縣
土目夜莫叩關竇奏貴州土司安疆臣說獻地為解
崛強若此且改縣多年孰得易之不必再勘報可

丁酉前刑部右侍郎呂坤上言科臣戴玉衡謂臣所
輯閨範圖說包藏禍心臣于萬曆庚寅年刻是書不
意外戚鄭承恩重刻疑臣逢迎掖庭也上下不問

庚子策貢士顧起元等三百人賜趙秉忠等進士及
第出身有差

吏科給事中劉道亨劾大學士張位結黨亂政黨指
國子祭酒劉應秋右都御史徐作等上怒謫道亨樂

清主簿

工科給事中楊應文議開沕河沕河在滕嶧沂沐下
流南通淮海隆慶以來數議未決前舒應龍嘗鑿韓
莊中輟時河決單縣黃堙口請終其功報可

丙午國子祭酒劉應秋工部署印右都徐作各奏辦
下問

壬子趙志臯請皇長子冠婚是日禮部右侍郎劉楚
先等吏部尚書蔡國珍等前軍都督府徐文煒等太
常寺卿范崙等禮科給事中項應祥等御史黃紀賢
等俱詣文華門上章候旨云必得命乃退命司禮太

監田義諭曰此大典也稍俟時月何相披為群臣頓首退

海州烏槍大鳴錦州城旂端出火

存問前禮部尚書陸樹聲

巡按河南御史姚思仁薦光州貢士蔡毅中孝行旌之

銀歹犯寧夏中衛總兵杜桐令叅將蕭如蕙追至水塘溝斬六十二級廣武營游擊張詩斬二十五級

四月乙卯朔丙辰時東師九萬人以前副總兵鄧子龍善水戰命領旅順水營出海